



En Groschen

Von Peter Riehm

för nex on wer nex

Denn Pollezei üt et Dörp stohn in sinnen Gaden on hat de Klompen ahn. Et wor Fruggjohr, on weil hei en Mann wor, denn ömmer frugg dorbej wor, so wor hei all ant Meßschuven. Jowell, so staats en Pollezei in de Uniform ütsüht, son anderen Indrock mäk hei, wenn hei ganz gewöhnliche Arbeit düht. Meßfahren ös en stenkrege Arbeit. Gern dei de Pollezei et nit, mar wenn me en Trop Kender hät, on die hewwen all en gujen Appetit, so mot me all en Stöck Gaden bearbejen, för Gemüs on Erpelen in de Pott tu kriggen. Wie gesagg, hei wor nit in de rosegste Stemmong. Wie hei nou de erste Foor (Furche) ant ütsetten wor, kom ehnen vann sinne Pöös üt de Schol nor Hus on me sog et öm ahn, hei hat en Ahnleggen.

„Vader, denn Lehrer hät ons gesagg, wej sollen en Groschen metbrängen“, begennt hei.

„Wat“, säht de Vader, „en Groschen? Well denn Millionär wodden? Hier en Groschen on dor en Groschen, glöv denn, ek dei et Geld sälvs maken. Ek krigg ok min Geld mar blos van et Amp. Wat well denn Fottekloppe dann wer?“

„Morgen kömp en Mann bej ons in de School, denn well ons Belder zeigen, son Kino ös dat. Denn Lehrder säht, dat wör schön on dor kös me wat van lehren.“

„Wat van lehren! Jong, ek mot lachen. Wat ös dor all bej tu lehren. Ou, oder völmehr, mej, geht denn Groschen fleu-

ten. Wat gej gesiehn hewt, vergett gej jor doch.“

Kenne van beide sagg mehr wat. Nor en Tittlang Schwiegen säht de Vader:

„Nou, dou sas denn Groschen hewwen, mar et ös doch mar för nex on wer nex.“

Denn Jong kreg denn Groschen on stook öm sech fott, innerlech froh, dat hei öm hat. Hei kos in sinn kendlech Gemüt nit verstohn, dat denn Vader so öm en Groschen knöttern dei, äwer et sollden noch bäter kommen. Et wudden Ovend, on denn Vader stohn noch in de Gaden ant arbejen. Dor geng op ehnmol et Pöörtken an de Stroot. Denn Gräver kiek op on süht jömmes op et Hus ahnkommen. Denn schloffden met de Haken över de Grond, ös wenn hei möj wor. En Hut hat hei op, denn hat mehr son Fazunn, äs wenn et en Pannekuenschottel wor. Völ Rand on wenneg Kopp. Wie hei för den Pollezei stohn, grienden hei över et ganze Gesech, trock sinnen Filz van de Kopp on frögg:

„Sind Sie der Ortspolliziste? Ich kumm von Sachsen. Bin uff der Wanderschaft. Meine Fleppen sinn in Ordnung. Ich wollte mich obdachlos melden!“

Jetzt reckten sech denn Pollezei op. Wenn hej ok de Klompen ahnhat, so wor hei jetz Beamter. Hei bekiek sech denn Tippler on löt sech de Papiere zeigen. Wenn hei ok schmäridge Fengers hat, so wor et nit schlemm, denn die „Fleppen“

sogen dor et völe Vorwiesen sowieso üt wie en Schwaat van en Ferken. Lang liet sech de Pollezei Titt för tu kieken, dann klappten hei de Fleppen tu on sagg:

„Wie lange wollen Sie denn noch wandern?“

„Wie lange ich noch wandern will? Bis ich wieder heime bin, aber die Nacht möcht' ich im Dorf schlafen. Sie hören's ja, ich melde mich obdachlos.“

„Ja“, säht de Pollezei, „hier im Dorf ist keine Bleibe für Sie. In einer Stunde können Sie in der Kreisstadt sein. Mel-den Sie sich da.“

„Ach du griene Neune! Soweit soll ich noch latschen? Dat schaff ich nimmer. In en Graben liegen de Nacht kann ich ooch nicht. Es ist zu kalt in der Nacht. Ich gehse kaputt! Übrigens, Sie müssen mich hinbringen.“

Die ganze Titt hat denn Jong dorbej gestohn on sin Vader beobach, wat denn jetzt well maken woll. Wahrhaftig, denn Vader gripp nou in den Täsch on hölt et „Pottmaneh“ herüt, on jetz passiert dat Ongeheuerleche: Vader gew denn fröm-den Tippler en Groschen!!! Met en stell Grens gew hei öm de Kerl on säht:

„Wir haben Straßenbahnverbindung bis zur Kreisstadt. Fahren Sie für den Groschen hin!“

Denn Tippler satt sinne Pannekuken-schottel op on bedank sech, mäk kehrt on

geht dor et Pörtken nor de Strootenbahn. Vader on Sohn keeken öm nor met Schwiegen. Op ehnmol säht de Jong:

„Vader, denn Groschen ös för nex on wer nex!“

„Wieso dann, Jong?“

„Denn Tippler versüpp denn jor doch! Mej vos dou kennen Grosch gäven för de School on denn Kerl gävs dou en Groschen, ohne tu knöttern.“

„Jong sin stell, dat ös wat anders! Ek hew denn Groschen gern gegäven. Wetse, ek bön Amtsperson. De Kerl hat sech bej mej gemeld on ek hät öm, weil hier kenn Obdach ös, nor de Stadt brengen möd-den. Denn Groschen hew ek schon gut ahngelagg!“

Die Tit hät et bewesen, dat denn Groschen nit gut ahngelagg wor. Denn Tippler molden an de Pollezei sin Pöörtken en „Zenk“, die beseggen dei, dat et int Hus trotz Pollezei Geld för Schlopen gegäven wöd.

Mänchmol hät et de Pollezei noch en Groschen gekos. Alle paar Weeken komen de Kunden, öm die Gons üttunützen. Wenn me et sech bedenk, wor dat en schlech Geschäft, mar me gäv schon lieber en Groschen, wenn me dorför nit twee Stond tu lopen bruck, also sin Ruh hät on dat Meldongen schrieven nit tu ma-ken bruck.

